

**VENDIM**  
**Nr.901, datë 19.12.2007**

**PËR MIRATIMIN E STRUKTURËS DHE TË NIVELEVE TË PAGAVE TË NËPUNËSVE CIVILË/NËPUNËSVE, NËPUNËSVE TË KABINETEVE DHE PUNONJËSVE MBËSHTETËS NË ADMINISTRATËN E DISA INSTITUCIONEVE TË PAVARURA**

Në mbështetje të nenit 100 të Kushtetutës, të neneve 18 e 29 të ligjit nr.8549, datë 11.11.1999 “Statusi i nëpunësit civil”, të nenit 5/1 të ligjit nr.8487, datë 13.5.1999 “Për kompetencat për caktimin e pagave të punës”, të ligjit nr.9584, datë 17.7.2006 “Për pagat, shpërblimet dhe strukturat e institucioneve të pavarura kushtetuese dhe të institucioneve të tjera të pavarura, të krijuara me ligj” dhe të ligjit nr.9645, datë 27.11.2006 “Për Buxhetin e Shtetit të vitit 2007”, të ndryshuar, me propozimin e Ministrit të Brendshëm dhe të Ministrit të Financave, Këshilli i Ministrave

**VENDOSI:**

1. Zbatimin e këtij vendimi, për këto institucione të pavarura, të krijuara me ligj:
  - a) Komisionin e Shërbimit Civil;
  - b) Autoritetin e Konkurrencës;
  - c) Inspektoratin e Lartë të Kontrollit dhe Deklarimit të Pasurive;
  - ç) Autoritetin e Mbikëqyrjes Financiare;
  - d) Entin Rregullator të Telekomunikacioneve;
  - dh) Entin Rregullator të Energjisë;
  - e) Entin Rregullator të Sektorit të Furnizimit me Ujë dhe Largimit e Përpunimit të Ujërave të Ndotura;
  - ë) Këshillin Kombëtar të Radios dhe Televizionit;
  - f) Avokatin e Prokurimeve.
2. Struktura dhe nivelet e pagave për nëpunësit civilë/nëpunësit e institucioneve të përmendura në pikën 1 të këtij vendimi, janë sipas lidhjes nr.1, që i bashkëlidhet vendimit dhe është pjesë përbërëse e tij.
3. Paga e grupit (kolona 2) e lidhjes nr.1, diplomë e shkollës së lartë, është 10 050 lekë.
4. Shtesa për vjetërsi në punë (kolona 3) e lidhjes nr.1, jepet në masën 2 për qind pas çdo viti pune, deri në 25 vjet dhe llogaritet mbi pagën e grupit.
5. Shtesa për kualifikim (kolona 4) e lidhjes nr.1, përcaktohet, si më poshtë vijon:

Nëpunësit civilë/nëpunësit, në administratën e institucioneve të përmendura në pikën 1 të këtij vendimi, përfitojnë shtesë për kualifikim, për gradën apo titullin shkencor, sipas lidhjes nr.3, që i bashkëlidhet vendimit dhe është pjesë përbërëse e tij.

Kriteret për përfitimin e shtesës janë:

  - a) për nëpunësit civilë/nëpunësit kjo shtesë jepet në kushtet e përputhjes së kualifikimit, gradës apo titullit shkencor, me përshkrimin e pozicionit të punës, pas miratimit, rast pas rasti, nga njësitë e personelit;
  - b) në rastin kur nëpunësi civil/nëpunësi ka kualifikim, gradë apo titull më të lartë se ai i përcaktuar për pozicionin e punës, sipas lidhjes nr.3, që i bashkëlidhet vendimit, ai përfiton vetëm shtesën e përcaktuar për pozicion;
  - c) në rastin kur nëpunësi civil/nëpunësi ka kualifikim, gradë apo titull më të ulët se ai i përcaktuar për pozicionin e punës, sipas lidhjes nr.3, që i bashkëlidhet vendimit, ai përfiton shtesë, në përputhje me kualifikimin, gradën apo titullin që ka;
  - ç) në çdo rast si më sipër, pavarësisht nga kualifikimi, grada apo titulli, nëpunësit civilë/nëpunësit përfitojnë vetëm shtesën për gradën apo titullin shkencor më të lartë që kanë.
6. Shtesa për pozicion është sipas kolonës 5 të lidhjes nr.1.
7. Kategorizimi i pagave për pozicionet e punës me emërtesë të njëjtë përcaktohet në kuadër të miratimit të strukturës dhe organikës së secilit institucion, me vendim të Kuvendit.
8. Kategorizimi për pozicionet e veçanta të jetë sipas lidhjes nr.2, që i bashkëlidhet këtij vendimi dhe është pjesë përbërëse e tij.
9. Struktura dhe nivelet e pagave për nëpunësit e kabineteve të institucioneve të përmendura

në pikën 1 të këtij vendimi përcaktohen, si më poshtë vijon:

- a) drejtori i kabinetit barazohet në pagë me nëpunësin civil, të kategorisë II-a;
- b) këshilltari dhe zëdhënësi barazohen në pagë me nëpunësin civil, të kategorisë II-b;
- c) paga e pozicionit “Sekretar i titullarit”, “Sekretar i organit kolegjal drejtues” është 47 500 lekë në muaj. Shtesa për vjetërsi në punë për pozicionin “Sekretar i titullarit”, “Sekretar i organit kolegjal drejtues”, jepet në masën 2 për qind pas çdo viti pune, deri në 25 vjet dhe llogaritet mbi vlerën 10 050 lekë.

10. Shtesa për kualifikimin, gradën apo titullin shkencor, e përcaktuar sipas lidhjes nr.3, që i bashkëlidhet këtij vendimi, si dhe të kriterëve të përcaktuara në pikat 5/a, 5/b, 5/c dhe 5/ç, zbatohet edhe për titullarët/anëtarët e organeve kolegjiale drejtuese, me kohë të plotë dhe nëpunësit e kabineteve.

Institucionet e përmendura në pikën 1, për aplikimin e shtesës për kualifikim, duhet të zbatojnë rregullat e udhëzimit të përbashkët të Ministrisë së Arsimit dhe Shkencës, Ministrisë së Financave dhe Departamentit të Administratës Publike.

11. “Specialistët”, “Përgjegjësit e sektorit” apo “Drejtorët e drejtorive”, të cilët punojnë në pozicione, që lidhen me procesin e informatizimit të veprimtarisë së administratës publike dhe kërkojnë, në mënyrë të detyrueshme, arsimin e lartë në degët “Inxhinieri elektronike” apo “Informatikë”, përfitojnë një shtesë “Për kushte pune”, prej 15 000 lekësh mbi pagën mujore të kategorisë përkatëse, pas miratimit, rast pas rasti, nga njësitë e personelit të çdo institucioni.

12. Nëpunësit e kabineteve dhe nëpunësit civilë/nëpunësit e institucioneve të përmendura në pikën 1 të këtij vendimi, nuk përfitojnë shtesa të tjera mbi pagë, të përcaktuara me akte të tjera nënligjore të Këshillit të Ministrave.

13. Për punonjësit mbështetës të institucioneve, që përcaktohen në pikën 1 të këtij vendimi, zbatohet lidhja II/M “Paga bazë për punonjësit e ministrive, institucioneve të tjera qendrore dhe prefekturave” dhe lidhja II-5 “Niveli i pagave për punonjësit e ministrive, institucioneve të tjera qendrore dhe prefekturave”, që i bashkëlidhen vendimit nr.726, datë 21.12.2000 të Këshillit të Ministrave “Për pagat e punonjësve të institucioneve buxhetore”, të ndryshuar.

Ky vendim hyn në fuqi pas botimit në Fletoren Zyrtare dhe i shtrin efektet financiare, si më poshtë vijon:

- a) Për Avokatin e Prokurimeve, nga data e emërimit të nëpunësve/punonjësve;
- b) Për institucionet e tjera, pas hyrjes në fuqi të vendimit.

**KRYEMINISTRI**  
**Sali Berisha**

## Lidhja Nr. 1

| KLASA | POZICIONI                            | KATEGO<br>RITË | PAGA MUJORE                     |                                                 |                                  |                                |
|-------|--------------------------------------|----------------|---------------------------------|-------------------------------------------------|----------------------------------|--------------------------------|
|       |                                      |                | PAGA INDIVIDUALE<br>(PAGA BAZË) |                                                 |                                  | SHTESA E<br>POZICIONIT         |
|       |                                      | 1              | 2                               | 3                                               | 4                                | 5                              |
|       |                                      |                | Paga e grupit (PG) lekë         | Shtesa vjetore për Vjetërsi (SHV), në përqindje | Shtesa për Kualifikim (SHK) lekë | Shtesa për Pozicion (SHP) lekë |
| I     | Sekretar i Përgjithshëm              | I-b            | 10.050                          | 2%                                              |                                  | 110.900                        |
| II    | Drejtor i Drejtorisë së Përgjithshme | II-a           | 10.050                          | 2%                                              |                                  | 100.500                        |
|       | Drejtor Drejtorie                    | II-b           | 10.050                          | 2%                                              |                                  | 84.000                         |
| III   | Përgjegjës Sektori                   | III-a          | 10.050                          | 2%                                              |                                  | 65.000                         |
|       | Përgjegjës Sektori                   | III-a/1        | 10.050                          | 2%                                              |                                  | 55.000                         |
|       | Specialist i nivelit të lartë        | III-b          | 10.050                          | 2%                                              |                                  | 49.000                         |
| IV    | Specialist i nivelit të mesëm        | IV-a           | 10.050                          | 2%                                              |                                  | 37.450                         |
|       | Specialist                           | IV-b           | 10.050                          | 2%                                              |                                  | 25.850                         |

**KATEGORIZIMI I POZICIONEVE TË PUNËS PËR FUNKSIONET E  
VEÇANTA NË INSTITUCIONET E PAVARURA**

| <b>INSTITUCIONI</b>                                                      | <b>POZICIONI</b>                      | <b>KATEGORIA E PAGËS</b> |
|--------------------------------------------------------------------------|---------------------------------------|--------------------------|
| Inspektoriati i i<br>Lartë i Kontrollit<br>dhe Deklarimit të<br>Pasurive | Inspektor i Lartë                     | <b>II-b</b>              |
|                                                                          | Ndihmës inspektorë të lartë           | <b>III-a</b>             |
| Këshilli Kombëtar<br>i Radios dhe<br>Televizionit                        | Përgjegjës i Studios së Monitorimit   | <b>III-a</b>             |
|                                                                          | Monitorues                            | <b>IV-a</b>              |
| Avokati i<br>Prokurimeve                                                 | Inspektor                             | <b>III-a</b>             |
| Autoriteti i<br>Mbikqyrjes<br>Financaire                                 | Inspektor në Drejtorinë e Inspektimit | <b>III-a</b>             |

Lidhja Nr. 3

| POZICIONI                                                                                              | KUALIFIKIMI/<br>GRADA/TITULLI<br>SHKENCOR                                                                       | SHTESA<br>(LEKË/MUAJ) |
|--------------------------------------------------------------------------------------------------------|-----------------------------------------------------------------------------------------------------------------|-----------------------|
| Titullar.<br>Anëtarë të organeve kolegjiale drejtuese<br>me kohë të plotë.<br>Sekretar i Përgjithshëm. | Profesor.                                                                                                       | 30.000                |
|                                                                                                        | Profesor i asociuar.                                                                                            | 25.000                |
| Drejtor Kabineti.<br>Këshilltar.<br>Drejtor i Përgjithshëm.<br>Drejtor                                 | Doktor i Shkencave.                                                                                             | 20.000                |
|                                                                                                        | Doktor i Shkencave                                                                                              | 25.000                |
| Përgjegjës Sektori.<br>Inspektor<br>Specialist.<br>Monitorues.                                         | Studime të thelluara<br>pasuniversitare/Mas<br>ter i Nivelit të Dytë.<br>Studime<br>Specializuese<br>Afatgjata. | 10.000                |
|                                                                                                        | Studime të thelluara<br>pasuniversitare/Mas<br>ter i Nivelit të Dytë                                            | 20.000                |

**Shënim:** Vlerat 20.000 lekë, për diplomat “Master i Nivelit të Dytë/Studime të Thelluara Pasuniversitare” dhe 25.000 lekë, për gradën shkencore “Doktor i Shkencave”, aplikohen për nëpunësit/titullarët, që i kanë përfituar diplomat përkatëse në universitetet, apo shkollat e larta të vendeve të përcaktuara sipas listës që do t’i bashkëlidhet udhëzimit të përbashkët të Ministrisë së Arsimit dhe Shkencës, Ministrisë së Financave dhe Departamentit të Administratës Publike (pika 10 e këtij vendimi).